

բաթում և Ղարաբաղում. 2) Միաժամանակ, խորհրդաժողովը պնդում է, որ Հայաստանի և Ազրբեջանի կառավարութիւնները ամենակտրուկ միջոցներ ձեռք առնեն վերացնելու համար հայ և մահմետական ազգաբնակչութիւնների միջև ընդհարման բոլոր հնարաւորութիւնները՝ համապատասխան հանրապետութիւնների սահմաններում: 3) Այս որոշման մասին շտապով տեղեկացնել Ազրբեջանի և Հայաստանի կառավարութիւններին, որպէսզի նրանք ձեռք առնեն համապատասխան միջոցներ»:

Ծրդ նիստում, ապր. 12-ին, խորհրդաժողովը զբաղւեց արիւնհեղութիւնը դադարեցնելու պայմաններով, դարձեալ երկար վէճ ծագեց հայերի և ազրբեջանցիների միջև Ղարաբաղի մասին: Վերջիններս պնդում էին, որ Ղարաբաղը Ազրբեջանի մասն է և Ղարաբաղի խնդիրը՝ Ազրբեջանի ներքին խնդիր. հայերը, ընդհակառակը, համարում էին, որ Ղարաբաղը Ազրբեջանի մաս չէ: Երկու կողմերը մնացին իրենց տեսակէտին, և որոշեց «անմիջապէս լիովին վերականգնել այն իրաւական վիճակը, որ գոյութիւն ունէր ընդհարումներից առաջ և հիմնւած էր հայ-ազրբեջանեան և անդրկովկասեան հանրապետութիւնների խորհրդաժողովներում ձեռք բերւած համաձայնութեան վրա՝ կառավարութիւնների հետ ազգային խորհուրդների պայմանագրի հիմամբ»:

Նոյն նիստում որոշեց ընտրել 6 հոգինոց յանձնախումբ՝ 2-ական ամէն մի պատիրակութիւնից և ուղարկել Ազրբեջան ու Հայաստան խորհրդաժողովի որոշումը գործադրելու համար:

Ապա ուղարկեց 3 յանձնախումբ. մէկը՝ Մախարաձէ, Մամիկոնեան, Աղայե՝ Ղազախ, ուր նոյնպէս հայ-թրքական ընդհարումներ էին պատահել. միւսը՝ Ի. Ռամիշվիլի, Ա. Աբեղեան ու Ջ. Սուլթանով՝ Շարուր-Նախիջևան և երրորդը՝ Ղարաբաղ: Յանձնախմբերը մեկնեցին համապատասխան վայրերը, բայց յետագայ դէպքերի պատճառով չօչափելի գործ չկատարեցին:

Այնուհետև խորհրդաժողովը երկարօրէն զբաղւեց կոնֆեդերացիայի հարցով: Ազրբեջանի պատիրակութիւնը ներկայացրեց «Անդրկովկասեան Հանրապետութիւնների Սորհրդի» նախագիծը: Առաջարկւում էր երեք հանրապետութիւնների ներկայացուցիչներից կազմել մնայուն միջազգային մի խորհուրդ, որի պարտականութիւնը պիտի լինէր «1) հոգալ հանրապետութիւնների արտաքին ապահովութիւնը և նրանց անկախութեան ու չէզոքութեան պահպանումը, 2) հսկել, որ հանրապետութիւնների միջև ծագող վիճելի խնդիրների լուծումը միջնորդ դատարանի կողմից՝ գործադրի, 3) հետևել, որ կիրառւեն դաշնագրերը հանրապետութիւնների միջև, 4) մշակել միջհանրապետական դաշնագրերի նախագծեր, 5) ձգտել խաղաղութեամբ լուծելու հանրապետութիւնների միջև ծագող վէճերը և եզրակացութիւններ տալ առանձին հանրապետութեանց կառավարութիւններին առաջարկով»: Սորհուրդը պիտի կազմէր 12 հոգուց. իւրաքանչիւր հանրապետութիւն պիտի տար 2 ներկայացուցիչ խորհրդարանից և երկու՝ կառավարութիւնից, մէկ տարի ժամանակով: Սորհուրդը պիտի ունենար սովորական և արտակարգ նստաշրջաններ: Եւ այլն:

Ի հարկէ, այս դեռ կոնֆեդերացիա չէր, բայց մի քայլ էր դէպի կոնֆեդերացիա: Ազրբեջանցիք քայլ առ քայլ հետապնդում էին իրենց հիմ-